

Tierweihnacht

Ein etwas anderes Krippenspiel. Die Weihnachtsgeschichte aus der Sicht von Tieren. Die Kinder können als Tiere verkleidet sein oder auf Steckentieren reiten. Entsprechende Landschaften können über Beamer an die Wand geworfen werden.

© 2012 by hanna@klenk.ch

Lied: Das isch der Stärn vo Bethlehem

Landschaft Eisberge

Sprecher Vor langer, langer Zyt sind zwei Pinguine uf ere Isscholle in der Nöchi vo Füürland gsässe. Sie händ in Himmel ufe glueget und sich gwunderet.

Pinguin 1 Lueg emal dä helli Stärn, Brüederli! So eine han ich no nie gseh.

Pinguin 2 Ich au nid.

Pinguin 1 Es gseht us, als würd är wandere. Meinsch nid au?

Pinguin 2 Ja, dä bewegt sich!

Pinguin 1 Dä wott eus vielycht öppis zeige.

Pinguin 2 Mi nimmt nume wunder, was!

Pinguin 1 Du Gwunderschnabel, das chönnte mir usefinde.

Pinguin 2 Wie denn?

Pinguin 1 Dänk eifach hindedryschwimme. Los gömmer.

Pinguin 2 Los gömmer.

Lied: Vom Himmel hoch, da komm ich her

Landschaft Regenwald

Sprecher Die zwei schwarzwyss komische Vögel sind uf und dervo, em Stärn noche Richtig Norde. Underwägs händ sie natürlich e chly gfischt und öppe chly usgrueht. Eimmol synds noch am Land ume plätschetret, do händs es komisches Grüüsch ghört. Uf eme Baum im Urwald isch en Vogel ghocket und het gchrächzet. Dä isch ganz andersch als gsy sie. Heyo die zwei händ wie Schwarzwyssfotone usgseh und dä ander wienes Farbbild. Usserdäm het är en riesige Schnabel gha.

Pinguin 1 Du bisch aber en komische Vogel. Wär bisch du und wie chasch denn du schwimme mit some riese Schnabel? Bruuchsch dä zum ruedere?

Tukan Ruedere, schwimme? Uhh, nei, Wasser isch nass und höchstens zum trinke guet. Ich bin en Tukan und dir beide sind doch Fisch, oder?

Pinguin 2 Nei, mir sind Pinguine und richtigi Vögel!

Tukan Vögel? Dir? Chömet mol e chly nöcher. Ha, ha, dir gwagglet ja vo einere Syte uf die ander. Das gseht denn luschtig us! Wie stoht's denn mit fliege bi euch?

Pinguin 1 Fliege, in Himmel ufe? Ihh, nei, das isch nüt für eus!

Pinguin 2 Derfür sind mir ganz schnäll under Wasser!

Tukan Komischi Vögel, komischi Vögel, nid emol fliege chönds! Was wänd ihr überhaupt do im Urwald?

Pinguin 1 Nüt! Mir sind uf em Wäg, em Stärn noche.

Tukan Dir meinet, dä helli, neu! Stärn? Dä rüeft mi auch schon es paar Täg, aber ich han Angscht gha, ihm noche z'fliege.

Pinguin 1 Chumm doch mit eus, denn sind mir scho drü.

Tukan Guet, aber bitte blybet nöch am Land.

Pinguin 2 Los gömmer.

Lied: Freu dich Erd und Sternenzelt

Landschaft Hochgebirge

Sprecher So sind die beide Pinguine und der Tukan miteneand wytergreist. D'Landschaft het sich veränderet, höchi Bärge, wenig Wald und ganz anderi Bäum händ's gseh. Do isch ufds Mol en dunkle Schatte übers Wasser cho. Verschrocke häünd die drü ufegluet.

Tukan Passet uf, dört obe isch ganz en grosse Vogel. Das isch alwäg en Räuber.

Pinguin 1 Jetzt taucht är abe. Achtung!

Pinguin 2 Är het en Fisch gfange!

Tukan He du, die zwei scharz-wysse sind keini Fisch, das sind Vögel wie mir beidi! Las die in Rueh!

Adler Das weiss ich dank, du dumme Tukan. Ich weiss alles, ich bin en grosse Fischadler und kenne alli Gheimnis.

Tukan Aha, denn weisch du au, wo ane als eus dr Stärn fñehrt?

Adler Wele Stärn?

Tukan He, dä hell, lüchtig dört. Mir gönd ihm noche.

Adler Hm, komisch, das isch mir no gar nid ufgfalle. Was bedütet das ächt?

Pinguin 1 Weisch es öppe nid, he?

Adler Doch, doch, natürlich, ich weiss alles, nur also ... in däm Fall mues ich nocheforsche. Ich geseh ja vo höch obe alles und weiss Bscheid und usserdäm chönnti me d'Mönsche froge.

Tukan Verstohsch du, was die redet?

Adler Also, nid diräkt, aber ich kenn en Übersetzer. Chömet mit.

Pinguin 2 Los gömmer.

Lied: O du fröhliche

Landschaft Miststock

Sprecher Und wyter sind die vier Vögel zumene Dorf und do uf em Mischstock isch en Guggel gsässe und hat kräit.

Hahn Güggerüggüü. Guete Morge, guete Morge liebi Vögel. Wänd er en Wurm? Ich han do ganz früschi.

Pinguin 1 Wööh, wär frisst denn Würm?

Adler Mir möchtet wüsse, was d'Mönsche über dä helli Stärn redet. Was bedütet dä?

Hahn Dr Stärn, jo das isch interessant. Es heisst, en neue König syg gebore worde und dr Stärn zeigi dr Wäg zu ihm.

Adler En König? Ich bin dr König vo de Vögel!

Hahn Reg dich nid uf, es isch en Mönschekönig und är chönni alli rette. Är syg dr Heiland, dr Messias für d'Wält.

Tukan Dä möcht ich au gärn gseh.

Pinguin 1 Ich au.

Pinguin 2 Ich au.

Adler Däm König wott ich au begägne.

Hahn Ich chumen au mit.

Pinguin 2 Los gömmer.

Lied: Tochter Zion

Landschaft Meeresküste

Sprecher Die zwei Pinguine, dr Tukan, dr Adler und dr Guggel sind also uf e Wäg. Dr Stärn het sie jetzt nach Oschte gfñehrt. Dr Adler isch höch obe vorus, het immer wieder e Insle oder es Schiff uskundschaftet wo dr Tukan und dr Guggel händ chönne absitze und so sind's lang underwägs gsy bis d'Pinguine an en Strand gwatschlet sind. Dr Tukan het sich en Pfoschte gsuecht und sini Fädere g'ordnet, dr Adler

isch uf en Stei ghocket und dr Güggel het schnäll en Mischstock gfunde und het afoh chratze. Plötzlich chunnt en grosse Stier cho z'rase, grad uf e Tukan los.

Stier Muhh, ich gsehn rot, muhh, ich gsehn rot.

Tukan Hilfe, Hilfe!

Adler Halt, halt, das isch nüt Gföhrlichs, liebe Stier. Das isch nume en Tukan mit halt farbigere Fädere als vylicht d'Vögel by euch händ.

Stier Das söll en Vogel sy? Cha denn dä bsunders luut singe mit däm grosse Schnabel?

Tukan Also singe isch nid eso mini Sach. Lueg min grosse Schnabel het keini Fädere druf. Wenn's heiss isch chan ich dermit wie Dampf abloh und abechüele. Das isch do by euch ja au nötig.

Stier Dampf abloh, das tönt guet. Das mues ich mängisch au. Wenn ich öppis rots gseh wie din Schnabel und dä Farbfläck an dim Buuch, denn mues ich eifach druflosrenne. Entschuldigung, ich han's nid bös gmeint. Oh, Achtung, da chunnt eusi Geiss, die het au immer Volldampf druf.

Geiss Mäh, mäh. He dir da, was sind dir für luschtigi Vögel? Wo chömet dir här? Was wänd ihr da? Händ die Schwarzwysse in dr Sonne d'Farb verlore? Und dä Mischstock ghört mir, da dörf me nid eifach scharre! Und du, Grossschnabel, chansch au rede? Bisch en Papagei? Du da, Adler, mach nume dr Schnabel wieder zue, ich weiss scho, dass du kei grossi Geiss frässe tuesch. Ich han im Fall Hörner und chan mich wehre. Lueg nume.

Hahn Mir gönd zum König.

Geiss Du, zum König? Bisch verruckt, dir chönd doch nid bim grosse König Herodes yneschpaziere! Dä isch im Fall gföhrlich! Da landisch höchstens in dr Pfanne, du Mischchratzer.

Adler Mir wänd nid zum grosse König. Dr Stärn zeigt eus dr Wäg zume neugeborene, chlyne.

Geiss E neue König? Ich weiss vo nüt. Dr Herodes het zwar ei Frau nach dr andere und vieli Söhn, aber die wo bis jetz überläbt händ, sind scho erwachse. Wohär wüset denn dir vo däm neue König.

Hahn D'Mönsche säge, d'Prophete heige dr Retter und Heiland vo dr Wält vorusgseit. En Stärn söll in Juda ufgoh. Simmer do rächt in Judäa?

Geiss Ja, das stimmt. Da sind ihr richtig.

Adler Also los, zeig eus dr Wäg.

Geiss He, he, nume nid so schnäll. Ich mues mich z'erscht erkundige. Aber mir Geisse händ da eusi Beziehige. Am beschte gömmer zäme in d'Hauptstadt Jerusalem. Do het's Schriftkundigi, die wüset sicher genau, wo dä verheissini König isch.

Pinguin 2 Los gömmer.

Geiss Momänt, was mache mir denn mit dir und dim Kolleg? Dir chömet ja nid vorwärts, dir Gwaggli. Hm, hm, hm ... ich han's! Ich versteck euch im Wage mit de Melone wo dr Buur uf e Märit fahrt. Am beschte stecke mir dä farbig Papagei au grad ine.

Tukan He, ich bin en Tukan im Fall!

Geiss Ja, und dich Güggel au. Und halt jo dr Schnabel, süscht ...

Hahn Ja, ja, d'Pfanne, ich weiss scho.

Stier Ich chumm au mit zum König.

Pinguin 2 Los gömmer.

Lied: Es ist ein Ros entsprungen

Landschaft Jerusalem

Sprecher So het d'Geiss die beide Pinguine, dr Tukan und dr Güggel uf em Melonewage under ä Decki packt und bald isch es losgange. Dr Adler isch höch obe als

Wächter mitgfloge, d'Geiss isch näbedra gumped und dr Stier hindedry trottet. Das Grumpel und Gschüttel isch nid grad agnähm gsy, aber so isch die Mannschaft ohni Problem uf Jerusalem cho. Dr Buur het sy Charre für d'Nacht abschtellte, damit är am Morge ein vo dä erschte chönnti sy zum sini Frücht verchauft. D'Geiss isch loszoge zum Erkundige yhole. Vos dunkel und schtill worden isch, het sie an dr Decki zupft und die vertschuderete Vögel sind füre gchroche. Die zwei Pingune händ dringend es Bad bruucht und so sinds zum Schafteich in dr Nöchi und die beide sind sofort inegumpet. Ihh, sind's verschrocke wo plötzlich en richtige Tiger sini Schnauze ins Wasser gsteckt het.

- Tiger *knurrt*
Pinguin 1 Pass uf, Brüederli, e Raubchätz!
Ross 1 Muesch nid Angscht ha, dä het keini Zähne meh.
Ross 2 Ja, er isch ganz en Liebe. Er chunnt drum vo dr Arena. Dört händs ihm sini scharfe Zähne usgrisse.
Adler Ui, simmer da in dr Arena glandet? Ghöret dir zwei zu dene Ross, wo bi de Wagerenne mitmachet? Ich han scho viel ghört vo dene römische Spiel. Die seiget fürchterlich brutal, d'Lüüt schreiet, tobet und verschleuderet en Huufe Gäld bim wette.
Ross 1 Nei, dr Zirkus isch usse vor dr Stadt und z'Nacht isch dört nüt los. Mir sind ebe ab, will eus das Läbe nid gfallt. D'Mönsche sind so brutal. Sie freuet sich, wenn Bluet fliesst. Das haltet keis Ross us.
Ross 2 Und dr armi Tiger händ mir grad mitgnoh.
Tiger *knurrt*
Geiss Was händ ihr jetzt vor? Dir chönd doch nid eifach furtlaufe. Wenn's Tag wird, fanget die euch schnäll y.
Hahn Es wird Tag? Güggerüggüüh!
Geiss Halt dr Schnabel, es isch no nid Zyt. Bis schtill, verratisch eus no!
Ross 1 Am liebschte würde mir öpperem diene, wo friedlich isch.
Ross 2 Vor em Schaffe händ mir kei Angscht.
Stier Ich au nid.
Tiger *knurrt*
Ross 2 Är au nid.
Geiss Chömet doch mit eus, mir gönd zum neugeborene König. Är isch dr Heiland vo dr Wält. Ich han usegfunde, dass en Prophet seit, är syg en Friedefürsch, en wunderbare Ratgäber, en starke Gott, en ewige Vater. Dä meint's sicher guet mit allne Tier.
Ross 1 Ja, das tönt guet. Zu ihm gömmer. Wo isch är denn, isch das wyt?
Geiss Die Weise säget, är sigi ihn Bethlehem gebore wil jetzt die richtigi Zyt isch. Das Städtli isch in dr Nöchi.
Tukan En Stärn het eus dr ganzi wyti Wäg do ane gfuehrt.
Ross 2 Los gömmer.
Tiger *knurrt*
Pinguin 2 Los gömmer.

Lied: Hört der Engel Chor steigt nieder

Landschaft Bergland Judäa, Bethlehem, Feld

Sprecher Die beide Pingune händ dörfe uf d'Ross ufechlättere, damit die Tier schnäller vorwärts cho sind. Dr Tukan het sini farbige Flügel gschüttlet und isch los gfloge, Dr Adler isch wieder vorus und het mit sine scharfe Auge uf em Wäg nach Gfahre Usschau ghalte. Dr Güggel isch immer es Stück gflatteret, het e chly usgrueht und isch denn wyter. D'Geiss het natürlich wieder d'Nase vorne gha und yfrig

schnupperet. Dr Stier het dr Chopf abegha und isch langsam aber glychmässig ins Tal abe. Dr Tiger isch ganz nöch bi dene beide Ross tappet wo süferlig ein Fuss vor en andere gschellt händ, damit die beide Pinguine nid abepurzlet. Heijo, schwümme chönd die beide guet, watschle und erscht ryte dergäge weniger. Plötzlich het dr Tiger wieder gchnurret.

Tiger *knurrt*
 Ross 2 Was isch los, Tiger?
 Tiger *knurrt*
 Ross 2 Hesch Hunger? Muesch no chly warte, mir findet scho öppis für dich.
 Schaf Bäähh, bäähh.
 Ross 1 Do isch neumet es Schaf. Chumm, chumm, muesch kei Angscht ha, dä Tiger macht dir nüt. Bisch ganz elei?
 Schaf Ich han die andere Schaf verlore, Ich weiss nid, wo dr Hirt isch!
 Ross 1 Oh, du arms. Chumm mit eus, mir findet sicher en Stall für dich.
 Stier En Stall? Do het's sicher Heu dinne. Ich han au Hunger.
 Tiger Miau, miau.
 Katze Miau, miau. Du bisch denn en Schöne, grosse.
 Ross 2 Jö, lueg da, es Büsi, es graus Büsi.
 Geiss Grau? Z'Nacht sind alli Chatze grau. Was machsch denn du da, Mietze?
 Katze Ich bin dank uf dr Jagd. Leider han ich bis jetz nur e verdruckti Muus gfunde, die isch allwäg under e Wage cho.
 Ross 2 Würdisch die eusem Tiger schänke? Är het nämlich Hunger und chan nid guet bisse.
 Katze Ja klar. En Guete!
 Tiger Danke, danke.
 Adler So, Geiss, wo isch jetz dä König? Ich gseh nienet es Schloss oder en Palascht.
 Hahn Aber dört hinde isch dr Stärn. Isch das es Loch in dr Felswand? E Höhli, en Stall?
 Stier En Stall isch viel gmüetlicher als ein Steipalascht. Mmhh, ich schmöcke Heu, vorwärts!
 Esel Iahh, iahh.
 Geiss Jetz bin ich aber verschrocke! He, du Esel, wär bisch, wohär chunnsch, was machsch?
 Esel Ich chume vo wyt her, vo Nazareth in Galiläa. Ich ghöre em Josef wo mit sinere Frau da nach Bethlehem cho isch zum sich in d'Lischte vom Kaiser ytrage z'lah. Sini Familie chunnt drum vo da.
 Geiss Denn sind dini Lüt sicher inere Herberg zum übernachtete?
 Esel Nei, es het drum nienet me Platz gha und d'Frau het doch sonen dicke Buuch gha. Do händs ändlich dörfe in en Stall.
 Schaf Dr Stall! Chumm zeig ihn mir. Denn find ich sicher au dr Hirt wieder.
 Esel Gärn, dört im Stall isch das Chindli uf d'Wält cho.
 Katze Es Bebe? Jöhh, chömet, mir gönd go luege.
 Pinguin 2 Los gömmer.
 Pinguin 1 Das isch euse König.
 Tukan Mir sind am Ziel!
 Adler Dr Retter isch da, dr Heiland vo dr Wält.
 Hahn So wie's d'Prophete gseit händ: S'Volk wo im Finschtere läbt, het es grosses Liecht gseh. Über dene, wo im Dunkle sind, strahlet's hell.
 Ross 2 Dr Messias isch cho.
 Geiss Ich freu mich, ich freu mich.
 Stier Ich au, ich au, muhh.
 Ross 1 Ja, gumpe und tanze wämmer vor Freud. Dr Friedefürscht isch gebore.

Pinguin 2 Los, tanze mer!

Alle Tiere tanzen vor Maria und Josef einen Reigen.

Lied: Ich steh an deiner Krippe hier

Landschaft Stall

Sprecher So sind eusi Tier, die beide Pinguin, dr Tukan, dr Adler, dr Guggel, dr Stier, d' Geiss, die zwei Ross, dr Tiger, s' Schöfli, s' Büsi und au dr Esel, am Ziel acho. Do hets au Weisi us em Morgeland gha. Au sie sind lang unterwegs gsy. Sie händ lang in de Schrifte gforscht gha und dä verheisseni Retter gsuecht.

Text 1 Daniel 7,13.14: Siehe, es kam einer mit den Wolken des Himmels wie eines Menschen Sohn und gelangte zu dem, der uralt war, und wurde vor ihn gebracht. Der gab ihm Macht, Ehre und Reich, so dass ihm alle Völker und Leute aus so vielen verschiedenen Sprachen dienen sollten. Seine Macht ist ewig und vergeht nicht, und sein Reich hat kein Ende.

Text 2 Micha 5,1: Und du, Bethlehem Ephrata, die du klein bist unter den Städten in Juda, aus dir soll mir kommen, der in Israel Herr sei, dessen Ausgang von Anfang und von Ewigkeit her gewesen ist.

Text 3 Jeremia 23,5: Siehe, es kommt die Zeit, spricht der Herr, dass ich dem David einen gerechten Spross erwecken will. Der soll ein König sein, der wohl regieren und Recht und Gerechtigkeit im Lande üben wird.

Text 4 Sacharja 9,9: Du Tochter Zion, freue dich sehr, und du, Tochter Jerusalem, jauchze! Siehe, dein König kommt zu dir.

Text 5 Psalm 22,28: Es werden gedenken und sich zum Herrn bekehren aller Welt Enden und vor ihm anbeten.

Sprecher Alli Tier, alli Chinder und au die erwachsene Mönsche chönd zur Chrippe goh und fröhlich singe. Im Jahr 1798 het dr Pfarrer Christoph von Schmid es Wiehnachtsgedicht gschriben. Dir kennet's sicher, wenn au nid alli acht Strophen. Singet mit!

Lied: Ihr Kinderlein kommet

1. Ihr Kinderlein kommet, o kommet doch all'! Zur Krippe her kommet in Betlehems Stall, und seht, was in dieser hochheiligen Nacht der Vater im Himmel für Freude uns macht.
2. O seht in der Krippe, im nächtlichen Stall, seht hier bei des Lichteins hellglänzendem Strahl in reinlichen Windeln das himmlische Kind, viel schöner und holder als Engel es sind.
3. Da liegt es – das Kindlein – auf Heu und auf Stroh; Maria und Josef betrachten es froh; die redlichen Hirten knien betend davor, hoch oben schwebt jubelnd der Engelein Chor.
4. Manch Hirtenkind trägt wohl mit freudigem Sinn Milch, Butter und Honig nach Betlehem hin; ein Körblein voll Früchte, das purpurrot glänzt, ein schneeweißes Lämmchen mit Blumen bekränzt.
5. O betet: Du liebes, Du göttliches Kind was leidest Du alles für unsere Sünd'! Ach hier in der Krippe schon Armut und Not, am Kreuze dort gar noch den bitteren Tod.
6. O beugt wie die Hirten anbetend die Knie, erhebet die Händlein und danket wie sie! Stimmt freudig, ihr Kinder, wer sollt sich nicht freun, stimmt freudig zum Jubel der Engel mit ein!
7. Was geben wir Kinder, was schenken wir Dir, du Bestes und Liebstes der Kinder, dafür? Nichts willst Du von Schätzen und Freuden der Welt – ein Herz nur voll Unschuld allein Dir gefällt.
8. So nimm unsre Herzen zum Opfer denn hin; wir geben sie gerne mit fröhlichem Sinn – und mache sie heilig und selig wie Dein's, und mach sie auf ewig mit Deinem nur Eins.